



**Qanoq iliorutta pisortat suliffeqarfiutaasa namminersortunut unammillerunnaartissinnaanerlugit  
apeqquteqaat aallaavigalugu oqallisissiatut siunnersuut.**

(Inatsisartunut ilaasortaq Aqqalu C. Jerimiassen, Atassut)

Qujanaq Inatsisartunut ilaasortaq Aqqalu C. Jerimiassen siunnersuummut.

Demokraatit politikikkut anguniagaani pingaarnersaavoq Kalaallit Nunaat aningaasaqarnikkut imminut napatittoq, Danmarkimit EU-milluunniit aningaasatigut tapiissutinik isumalluuteqanngitsoq.

Uagut isitsinni aningaasarsiornikkut imminut napatinnerunissamut aqut pitsaanerpaq tassaavoq, aalajangiinissatsinnut sapiissuseqarnissarput, inuiaqatigiinni aningaasaqarnermut pitsanngorsaataasussanik. Tassunga atatillugu akornutaavoq, nunatsinni pisortat ingerlatai maannakkutut annertunerujussuat naalagaavallaarnerujussuallu. Aningaasaqarnikkut imminut napatilissagutta namminersortut amerlanerujussuusariaqarput, taamaattumilluuna pingaaruteqartorujussuaq, namminersortut pitsaasunik sinaakkuteqartinneqalernissaat.

Taamatuttaaq pingaartuuvooq, ingerlatani amerlanerpaani kiffaangissuseqartumik ammasumillu unammillersinnaanerup pilersinnissaa. Tassani pingaaruteqarpoq, unammilleqatigiinneq assigiimik, ammasumik ersarissumillu piumasaqaatitaqartumik ingerlanissaa. Tamannalu unammillernarsinnaavoq soorlu sunnersuuteqartup siunnersuummini tamanna iserfigigaa.

Imaappormi, maani nunatsinni suliffeqarfeqarmat tamakkiisumik ilaannakumilluunniit pisortanit pigineqartunik, namminersortunut unammillertunik. Tamanna ajornaquteqanngikkaluarpoq, pingaartuuvorli, unammillernerit assigiimmik atugassarititaasunik peqarnissaat aammalu pisortani tamakkiisumik ilaannakumilluunniit sullissisoq taassuma kingunerisaanik unammilleqatigiinnermi iluaqtissanik pinginnissaa. Imaalinngisaannassaaq, suliffeqarfik namminersortunik pigineqartoq pisortanit unammillerneqarluni ipisinneqassasoq periarfissat naligiinnginneri peqqaallutik.

Tungaviatigut isumarput unaavoq, namminersortunut ingerlalluarsinnaasumik periarfissaqarpat, pissusissamisuunngilaq pisortat ingerlataannit peqataasoqassasoq namminersortut unammillerlugit.

Suliffeqarfiit pisortanit pigineqartut suliassatik pingaarutillit suliarilisigit, soorlu assersuutigalugu, namminersortutut ingerlatsisut tamakkiisumik ilaannakumilluunniit ingerlannissaannut imminut akilersissaanngitsutut isigineqartut.

Taakku suliassat niuernikkut suliarineqarsinnaanngitsut pisassiinikkut aamma sullissinissamik isumaqatigiissuteqarnikkut suliarineqassapput. Tamakku pisortanit namminersortunillu sullissisunit pisinnaapput.

Tassalu Demokraatit oqallinnermut isummersuutaat.